

警長郭智輝，綽號「叮噹」，加入警隊11年，自警察學院畢業後一直駐守水警至今。加入警隊前在社會工作了一段日子，期間經歷過沙士和金融風暴等經濟低迷時期，隨著年齡漸長，家庭壓力漸增，他決心改善生活環境，於是選擇投考了小時候的理想職業 - 警察。

叮噹當年投考警察面試時，考官問我最後一條問題：「點解你要做警察？」。如果係今時今日，叮噹一定答大會指定答案，係愛和責任。不過，當時叮噹答咗：「我要食飯。」考官只回答一句：「細佬，警察呢行飯唔係咁易食㗎。」

正如當時考官所講，曾經試過失業無飯食嘅叮噹開始發覺警察呢行飯真係唔易食。

警察學院刻苦的訓練令叮噹學識「好食，食多啲；唔好食，食飽啲」呢個道理。畢業後，叮噹駐守水警，但原來水警呢行飯又係唔易食。水警輪通常在香港水域邊界巡邏去打擊海上罪案和參與救援工作，但海面風高浪急，食飯後好多時都係嘔返落個筒入面，白麵包通常係叮噹和同事們最好的伙伴，因為食完嘔少啲。雖然工作環境惡劣，但他們從無怨言，因為他們清楚自己係守護香港的第一度防線。

幾年後叮噹去了機動部隊和特遣隊駐守，那段期間，社會風氣漸漸改變，示威行為漸趨激烈，每次緊守防線後都唔清楚幾時先再有飯食，彷彿食飯呢個動作喺叮噹生命中消失了；與家人和朋友飯局經常要取消或遲到早退，甚至連叮噹的婚宴也因為當晚有行動，結果有五圍同事未能出席。有時叮噹嫂都會抱怨話每晚自己一個人食飯，警隊係咪無咗叮噹唔得？的確唔係無佢唔得，而係多一分力會更好。結果，部門經過一段時間上下一心處理好當時社會問題後，叮噹和其他警察一樣可以食返餐舒服的飯。

隨住閱歷的增加，叮噹除咗關心自己食飯問題，亦關心別人享受食飯的機會，佢更加明白警察的職責係令到市民可以好好享受食飯，但有兩件事令到佢好痛心和食唔到飯。第一件事係2012年南丫海難，當晚叮噹全船人喺索罟灣做人流控制，目送最後一班人食完海鮮出海觀賞煙花之後，正預備叫外賣晚餐之際，災難就發生了。之後十多小時的救援工作間見盡生離死別，好多家庭被摧毀，從此唔可以再坐埋一齊食飯，那一頓海鮮餐就是他們一家人最後一頓飯。

第二件事係發生於2018年3月，叮噹在尖沙嘴跳海拯救了一隻銀狐犬（小白），以為小白脫離險境後可以繼續享受食飯的權利，可惜幾日後被主人從高處掉下慘死。你們可以感受到叮噹當刻是何等心痛嗎？動物都有生存及食飯的權利，點解要咁殘忍對待小白呢？之後七日，叮噹買咗七盒叉燒飯喺小白身故的後巷祭祀，希望小白感到人間有愛。

食飯的深層意義大家懂嗎？